

**Belanjawan Pembangkang Untuk Dapat 'Keuntungan Politik' - Muhyiddin Bernama
27 September, 2012**

KUALA LUMPUR, 27 Sept (Bernama) -- Timbalan Perdana Tan Sri Muhyiddin Yassin menyifatkan belanjawan yang dibentangkan pembangkang semalam adalah semata-mata untuk mendapatkan 'keuntungan politik' dalam pilihan raya umum akan datang.

Beliau berkata reaksi dan komen pakar-pakar ekonomi menunjukkan bahawa belanjawan itu tidak realistik kerana mengandungi banyak perkara yang ingin dihapuskan.

Apa yang ditawarkan dalam belanjawan itu bukanlah perkara baru kerana sebahagiannya terkandung dalam manifesto dan Buku Jingga.

Sebaliknya, kata Muhyiddin rakyat sebenarnya menantikan Belanjawan 2013 yang akan dibentangkan Perdana Menteri Datuk Seri Najib Tun Razak di Parlimen esok.

"Rakyat sedang menunggu-nunggu esok. Jadi, itu yang lebih utama kerana pihak pembangkang tidak mempunyai rasa tanggungjawab. Mereka boleh tawar bulan, bintang, matahari, cakerawala tetapi mereka tidak mempunyai locus standi untuk buat begitu.

"Mereka cuma nak menggambarkan inilah yang mereka akan tawarkan jika mereka menang pilihan raya. Bagi mereka, yang penting ialah untuk mendapatkan political mileage.

"Mereka bukan kerajaan, jadi mereka boleh buat apa-apa tawaran yang disebutkan dalam belanjawan itu," katanya kepada pemberita selepas menutup Festival Bahasa dan Sastera 2012 di sini, Khamis.

Muhyiddin berkata demikian ketika diminta mengulas belanjawan yang diumumkan Ketua Pembangkang Datuk Seri Anwar Ibrahim di Parlimen semalam, yang antara lain menggariskan beberapa langkah yang kononnya boleh membantu rakyat termasuk menghapuskan pinjaman Perbadanan Tabung Pendidikan Tinggi Nasional (PTPTN).

Beliau berkata pakar-pakar ekonomi turut mempersoalkan asas-asas belanjawan pembangkang yang dilihat tidak membolehkan negara berkembang berikutan berdepan banyak masalah.

"Tetapi kerajaan yang dipimpin oleh Perdana Menteri mengambil kira semua perkara. Ada asas-asas dan prinsip belanjawan yang bertunjangkan kepada keupayaan, menumpu dan menjurus kepada perkara yang mampu dibekalkan oleh kerajaan berdasarkan kepada perkara keutamaan dan dikehendaki rakyat.

"Ia juga mesti merupakan satu belanjawan yang realistik, berasaskan kepada hasil sumber negara, kawalan ke atas kewangan, menguruskan belanjawan secara berhemah. Ia mesti juga mengambilkira usaha mengurangkan defisit...hal-hal sebegini yang digunakan sebelum belanjawan itu dibentangkan oleh Perdana Menteri esok," katanya.

Muhyiddin berkata Belanjawan Pembangkang yang menyatakan ia akan menghapuskan pinjaman PTPTN juga tidak munasabah.

"Jika dihapuskan, sumber mana yang hendak dicari untuk membiayai keperluan pelajar pada masa akan datang, sedangkan penubuhan tabung pendidikan itu adalah bagi membantu pelajar daripada keluarga yang tidak berkemampuan dengan jumlah peruntukan yang disediakan lebih RM42 bilion, dan memberi manfaat kepada lebih sejuta pelajar.

"Jadi, mungkin bagi mereka yang mendapat pinjaman mendengar tawaran yang dibuat itu agak menarik, tetapi jika itu berlaku apa akan jadi kepada pelajar yang akan datang," katanya.

Jika itu berlaku, katanya lebih ramai anak-anak Malaysia tidak mampu melanjutkan pelajaran ke universiti berikutan tidak ada lagi tabung pendidikan diwujudkan.

Muhyiddin berkata jika diteliti, belanjawan pembangkang sebenarnya boleh menjadi bebanan besar kepada rakyat.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=697853>